

Despedida di directora di Cas di Aruba Sra. Desirée Croes



NA Cas di Aruba a tuma luga un recepcion pa tuma despedida di directora di Cas di Aruba Sra. Desirée Croes. Sra Croes lo huramenta ariba dialuna 31 di october como miembro di Parlamento pa fraccion di AVP.

Desirée Croes a cuminsa na bisa cu desde cu el a cuminsa cu su trabao na Cas di Aruba el a sinti su mes bon bin dor di e personal di Cas di Aruba. 'E dos añanan tabata tin "ups and downs"; momentonan dificil y momentonan hopi agradabel. Dos aña mi a siña hopi di mi coleganan y di tur e Arubianonan ey fo. Un sentimento particular ta bay na Fundacion Speransa cu mi a yuda funda. E despedida aki ta uno duro den mi curason, pasobra tur caminda cu mi a yega mi a sinti mi bon bini. Mi ta gradicido na boso pa tur cos cu boso a duna mi; e pasenshi cu boso tabata tin cu mi.' 'Mi ta spera cu mi por a haci e diferencia pa loke ta Cas di Aruba y e comunidad Arubiano. Pa Cas di Aruba mi a bisa di un principio cu tur nanishi mester ta den e mesun direccion; nos mester traha pa Aruba y mester ta mas uni. Boso ta a cara di Aruba: no solamente e personal di Cas di Aruba, pero tambe otronan cu ta traha pa Arubianonan. Boso por ta leu for di cas, pero boso ta un representante digno di Aruba aki na Hulanda,' asina Desirée Croes a bisa.

Sra. Croes a termina, bisando cu dialuna 31 di october e lo huramenta como parlamentario y e dia siguiente e lo cuminsa cu su trabao como parlamentario.

Den nomber di ATA Europa Jaap Ellis a gradici Desirée pa e cooperacion y a conta con Desirée a responde ariba un caso di un Arubiano cu tabata perdi. Jaap Ellis: 'Mi tabata na un bolsa na Italia, ora cu mi a haya un yamada di un muhe Arubiano cu a bisa cu su ruman desde un pari di siman caba ta perdi. Mi a drenta den contacto cu directora di Cas di Aruba Desirée Croes y mi a mande e

informacion tocante di e persona cu ta perdi. E siguiente dia mi a haya un yamada cu tanto polis y embahada di Hulanda ta involvi y cu despues nan a bin haya e persona aki na Barcelona. Awor aki e ta bek na cas y mi ta contento pa comparti esaki cu boso cu Desirée Croes a interveni y a contribui na haci esaki posibel.'

Jaap Ellis conhuntamente cu Caresse Dabian – den nomber de ATA – a haci entrega di un regalo na Desirée Croes.

PR di Cas di Aruba Sidney Kock a haci entrega di e regalo den nomber de personal di Cas di Aruba na Desirée Croes. Sr. Kock a disculpa Minister Plenipotenciario Edwin Abath cu no port a presente, pasobra e ta na Aruba en conexion cu e bishita di Reina Beatrix na Aruba. Tambe den nomber di e personal di Cas di Aruba Sidney Kock a gradici Desirée pa e cooperacion ricibi durante e ultimo dos añanan y a desea Desirée tur clase di exito den su trabao como parlamentario.

